

1 TEESARONIKA

Teesaroonika Máqanna Indaarú Nímu Akarafa.

1 ¹Ínnee Teesaroonika máqannaasa Ánutunaki máriasa karaambáiqá Yísuna ásauku mundíranaki faqa máriasa, ínnee Teesaroonika máqannaasa Yísuna ufara suqímariasa qinée Pauroosa faqa Sirasifa faqa Timootifa faqa ínni nímandaidaqa, ákara rúmannimaqaidaqa. Ánutuna káqi nímirá áfaarirana faqa asooárana narí aundurá faqa ínni faqa máriani.

Pauroofa Teesaroonika máqannaasa Ánutuna ufamau fímarunara nimooqídanoo.

²Maasá maaqóo márúnna namusa ínniara iriséeqa maqee maqee Ánutufinnai dúfi dúfi qídaqa, maqee maqee ínniara innaaru qímannimaqaidaqa.

³Maasá ínniara maqee maqee maasá qíkoona Ánutuna áaqoo áuqaidaqa. Ínnee Yísuna saqárikidaqa miqíanara Ánutuna ufírira áinainirana maqee maqee ímariafanoo. Ínnee Ánutunara faqa faiqí ánaaseera faqa nímuqusa ímarinara Ánutufinnai kadáapiri máriafanoo. Ínnee Yísunara asasammásee áfeesira írirafa karaambáiqá ásauku mundírana Yísunaki atukaramásee maríanara mináuqara faqa maasá irisée Ánutuna áaqoo áuqaida ínniara innaaru qímannimaqaidaqa.

⁴Teesaroonika máqusanaasa qíní qíkaqaafasaa Ánutufa ínniara ámuqusímarifa ínni rusandeesámumasee mároonara maasá íridaqa. ⁵Maasá Yísuna áufakiana sía nóonnai káifau ínni qímannimidau, Ánutuna afeekannái faqa miná náaquqara andeeqara maraqunannái faqa qeeqá faqa mi-iriránamau fídaqa minánnai faqa ínni qímannimifannana minára Ánutufa ínni rusandeesámunara íridaqa kúqaa fee qídaqa. Maasá ínni faqa Teesaroonika máqusai máriafana qíqafosaa máridaqa ínni dadaaqírara andeeqáseeqa máriafanausa máridaqa ínnee minára

írimariafanoo. ⁶Ínnee maasá andeeqárana qáfamasee karaambáiqá faqa maasá faqa andeeqárana ámeeraaméerirana faqa maasá faqa andeeqárana ámeeraaméeri maríafanoo, ínni máqannaasa Yísuna ufa írunara miná ákiaqara ínni aupúrarana firaqóo nímufaqa ínnee sía minára íriqau náaquqara maraquna nímimaru ásasirana asasammásee karaambáiqá ufa kai mároosa. ⁷Ínnee Teesaroonika máqannaasa miqíqá aiqáma ánaamuru Yísuna ufa írimarusa ínneeqa andeeqára óosana uqannífiqoonara ínnee Maseedoonia máqa maaqakina márusa faqa Kirisa máqa maaqakina márusa faqa uqannífiqoosa máriafanoo.

⁸Sía mi-maqa maaqa qandá kaifáu karaambáiqá ufa íriqau, aiqáma maqa maaqai ínnee Teesaroonika máqannaasa Ánutuna ufa írufa, mi-ufáfa aiqámai daráaninoo fífainínau. Maasá fífau ínniara mi-maqannáasa fíqú fíqú ídaqa qímannimiqa nímariafanaqa misá óoqai iriséeqa qímaqímiqa. ⁹Óoqai maasá ínni Teesaroonika máqusai óonuráfanaqa ínnee maasá asasamándeé óonu qífiqasee ámiqimasee maasá ufa írunara fáasai mi-anaamurúsa írimariqau. Ínnee ínneeqa dapi saqari Anutunara foorá innaaru qímaruna minnísee quándaki kúqaa ánoona kási marí Ánutufinnai ubeekáranara faqa fáasai mi-anaamurúsa iriséeqa minára aiqámausa qímannimimariqau. ¹⁰Ínnee mifúnnai ubeekámafi miná ámaaku innaarúnaindari qúmíranara áfeesu afeesirafa káqi áfeesida márunara fáasai ánaamuru minára faqa írimariqau. Ánutuna ámaaku Yísufa kúqíranakinaana mara fíndífufa, maasá Ánutufa kásooqaqee náruaninnanakinaana Yísufa maasá asumu qumáree marífa ínnee mifá qúmuaninnanara áfeesida márunara aiqáma ánaamuru fáasaimma irisée qímaqímiafanoo.

**Pauroofa Teesaroonika máqusai máridanoo
narí aináini marúnara qímanniminou.**

2 ¹Óo Teesaroonika máqannaasa qíní qíkaqaafasaaúqa. Maasá namu ínni maqúsaí fúafannakari sía kadíqamánnisaiqafana, ínnee minára írimariafanoo. ²Maasá namu Teesaroonika máqusai fuanéera Firipi máqusai óonuráfanaqa mandáikammannimaqeeqa mandá ufa qímunara írimariafanoo. Maasá ínni maqúsaí óonuraafanaqa moómoosa áanooqimannimaqoofaqa óonumafi íriafananoo Ánutufa paasóosirana nímufaqa miná ufa ínni Teesaroonika máqannaasa qímannimiqafana. ³Maasá qímannimirafa faqa sía áaqaranasaa mundínoo máridanoo sía maasá mandáinaina máraannanasaa mundínoo máridanoo, sía maasá ufa ákaruqíranasaa mundínoo máridanoo. ⁴Ánutufa maasá nimanamásee ínni qímannimíranara eedóo qímasee narí ámiqira fasaasa ufa maasásaa quqásainaqa maasá maqee maqee Ánutuna áidiramaú kai ínni qímannimidaqa. Ánutufa maasá fírana amanamásee qáfeemarifa máriafaqa minára irisée andeeqásee qímannimidaqa. Sía faiqí maasá ufa

irisée eedóo qiaqéerau qímannimidau. Ánutufa irisée eedóo qíaninnamau kai ínni qímannimidaqa.

⁵Maasá Ánutuna áfusaa máridaqa sía nimooqíra ufannaifau ínni qímannimiqiafana. Maasá Yísuna ufa qímannimidaqa sía maqándanaí óosana óosana ainaina úmmuariraree qímasee Yísuna ufa firaaqóo qímannimifanausa, andeeqéemariafanausa ínnée minára faqa írimariafanoo. ⁶Maasá ínni faqa máridaqa ínni fee akaqáusee sía misá nimooqíra ufara randáqiafana. ⁷Kúqaa maasá ásauku mundírafa niqíqoo fasiqausa maqásaa fasiqauqa máridaqa, maasá minára irisée sía ínniara qimooqíranee, aináínee qímiaqee qímariqiafana. Nínausa faiqi ánaaqi íreeda rakísi maríandee maasá miqíkai mándee íreedá kai ínni faqa máridaqa qímannimifanausa sía ínni moo áinaina máraqiafana. ⁸Maasá ínni Teesaroonika máqannaasara firaaqóo nímuqusimarunara sía Ánutunaindaraa ámiqíra fasaasa ufa kai náida nímiqa, maasá qeeqá dáriranara sía rufíqarai írirana faqa qímuqusa faqa káqi márirana faqa nímiqaaida máriqiafana.

⁹Óo qiní qíkaqaafasaa maasá ínni maqúsai ínni faqa máriafanaqa ínnée maasá óosana qáfamasee írimariafanoo. Maasá nárana máree maría saikána kadáapiriqa tooqaamu máraafana qáfaqau. Maasá Ánutufinnaindaraa ámiqíra fasaasa ufa qímannimiqa fífi inaqa ínnisaa óonu mundúanaqa ínnée maasá naranara mámaraida miqídammiafoo qifoorá fáasaana faqa eendáki faqa qeeqá kai nárana máree maría ainainirana kadáapiri máriafanaqa qáfaqau.

¹⁰Maasá ínnée Teesaroonika máqannaqa faqa máriafanna kamuqoo sía Ánutufa kai maasá márirana qáfanau, ínnée faqa qíqafóofanoo. Maasá ínni Yísunara rímarusa faqa máridaqa maasá ánukarana faqa andeeqáranana faqa pisoopísóoirana faqa sía áaqarana faqa máriafanaqa qíqafee marúsa máridaqa. ¹¹Faiqi níkausa ámiqimmandee faiqi rakísidaqa maasá miqí kai íqa ínni rakísimariqiafana. ¹²Maasá ínnée mandáinaina mároofaqa reendeenámma nímaqeeafánausa máridaqa. Ánutufa ínni náaraidanoo kásooqaqee innaarúnai óoruree narí aréenarana faqa narí quqúsara faqa miná faqa marasée narí faqa máriaqee qídanoo. Maasá ínniara minára iriséeqa ínnée maqee máriaqooqari Ánutuna ádiramaú kai fuaqa, minára fuki faakí qímariqiafana.

¹³Ánutuna áufakiana maasásaa quqásoona ínni qímannimiafaqa ínnée irisée umáraqau. Ínnée minára sía faiqí ufafée qímariqau. Ánutuna ufafée qímasee umáraqau. Miqúna qáfamasee maasá Ánutunara dúfi dúfi qídaqa. Kúqaa Ánutuna ufa máridanoo ínnée miná ufa írimariasakina saikídanoo.

¹⁴Óoqai Yuda máqannaasa nári niqoónausa ásauku mundírana Yísuna ufa írimarusa irisooná ákiaqara kadáapirirana nídafirana nímiqau. Ínnée Teesaroonika máqannaasa faqa ásauku mundírana Yísuna

ufa irisoofaqa ínniqa niqoónausa níkoqoofaqa miqí undée kai íqa nídafirana aupúrarana ínni nímiqau. ¹⁵Yuda máqannaasa óoqai Ánutuna tamummáqara fasiqauqa kuqá náriqau, kafáa maa-kamúqoo karaambáiq a Yísuna kuqámma arusaqau. Dóo kafáa maqee maasá mandáikamma qímaqaidaqa. Misá Ánutuna áfusaa firaqóo mandáikidaqa misá káaqa faiqí nárimariasa márídaqa. ¹⁶Maasá Ánutuna ufa faiqí asumu márararufa ánaamuru qímannimimarunaqa misá níkoqaiifaqa maasá rafáaqafírara amanídaqa. Miqídaqa Yuda máqannaasa áaqarafa dóo firaafá úriqaranoo márídanoo, dóo maqee mandáinaina ákiaqara Ánutuna áranaqarafa dóo misásaa áqufínoo márídanoo.

Pauroofa kaifáa Teesaroonika máqusai fuanéerusia minnísanau.

¹⁷Ánutufa misára miqí qímarifaqa qinée Pauroosa maasá qeeqára maaqí qídaqa. Yuda máqanna nífaqasaifaqa qúsasaa maasá níanai rakéeiqa márídaqa, qífaqa kái níanai rakéeiqa márídanoo. Maasá írirafa ínniki márifaqa fuanéera firaqóo amanúnanoo sía amanáikifaqa káqi márídaqa. ¹⁸Qinée Pauroosa faqa qíní faqa máriasa Teesaroonika máqusai ínee iannái fuanéera amanúnanoo sía ifaqa qinée qeeqá kai moómoo kari amanúnanoo Sadannafa qíní faqa ititáifaqa minníseeqa káqi Ateensa máqusai márídaqa. ¹⁹Yísufa qúminna aukwana ínee Teesaroonika máqannaasa faqa ánaamuru qímanniminausa faqa ínee ínni andeeqáranannai márifaqa qinée ínniara Yísuna áfusaa qeeqá faiqíara foora ínniara asasianáuranoo. ²⁰Maasá qeeqá qífaqa amooqírana faqa asasírana faqa ínniki márínara ínee maqee maríanara firaqóo írídaqa kumaaráa Timootina aqíqéeqa.

3 ¹⁻³Maasá ínni Teesaroonika máqannaasara kísaaqasaa múnari múnari fírariafanaisia dóo maqee minnísee rakéemasee Ateensa máqusai maasá namu káqi márídaqa maasá qíkaqa Timootifa maasá faqa Ánutuna saikáki marífa ámiqira fasaasa ufa ásauku mundíranara qímannimi noonífa maasá miná aqíqéeqa ínee iannái ínni poodúaanífeera ínee Yísuna saqárikirana dadaaqíanífeera, akaqáusa ínni nídafirana nímiifaqa sía quándaki fuaqéera Timootina ínee iannái aqíqéeqa. Aqíqámasee maasá káqi Ateensa máqusai márídaqa. Maasá Yísuna ufasáara nárirafa máríaninnanara Ánutufa óoqai maasára minakí fuaqée qímaqoo úfafa márídanoo. Ínee minára faqa írimariafanoo.

⁴Maasá Teesaroonika máqusaki márídaqa ínni qímannimiqa Yísuna ufa sáara nárirafa kambíqaannoo fee qíafannana dóo mifá kambíqaidanoo ínee minára faqa írimariafanoo. ⁵Qinée Pauroosa minára iriséeqa ínee iannái Timootina aqíqéeqa. Qinée ínni náufakiana sía uqanna íríqa kísaaqasaa márírana qíkoqaiifaqa múnari múnariqa Timootina aqíqéeqa. Mifá óonureenoo Yísunasaa mundíranara írianífeera aqíqéeqa, Sadannafa ínni níkarimaqasee qáfaifanoo qíní saiká kadíqaannoo fee sía fee kadíqaannoo.

⁶Dóo maqee Timootifa ónurandee aniréenoo ínni adíafaaira nauvakiana qífaqa íríqa. Mifá ínnee Yísuna saqárikirana faqa naríara naríara nímuqisirana faqa qímaqiminoo. Mifá ínnee maasára maqee maqee írimariana faqa maasá ínni níqafaaqairana amana amana kái ínnee maasá qíqafaaqaa ímarianara Timootifa qímaqimífaqa íríqa. Óoqai maasá qífaaqa rumbánoo márifaqa máriunasa. ⁷Ínnee Yísuna saqárikirafa káqi márínara maqee iriséeqa qífaaqa asasifanoo kadáapírírana faqa aupúrarana faqa dóo aufadéenoo. ⁸Ínneeqa márirana mapukúseeqa karaambáíqa áfusaa fíndífífaqa maasá qífaaqa ámiqíannoo.

⁹Dóo maqee maasá ínnee mapukúsee maríanara Ánutuna áfusaa dúfi dúfi qianáura. Maasá ínniara Ánutuna áfusaa asasídaqa minára faqa dúfi dúfi qímamaqaida. ¹⁰Maasá fáasaana eendáki ínniara Ánutufinnai innaaru qídaqa, Ánutufa dadaaqínaqa ínni nóori níndafamasee ínneeqa Ánutuna ufamau fírana andeeqá nímfífanoo.

¹¹Maasá Ánutufa maasá qíkoofa narí uqanna, maasá karaambáíqa Yísufa faqa maasá aaná afisúsainaqa ínnee iannái fuanáura.

¹²Karaambáíqa fannoo ínnee naríara naríara rírana firaanáikamma nímaqani, ínni aiqámausara nídirafa faqa maqee maqee firaanáikiani. Maasá ínniara dídirafa maqee maqee firaafáikidanoo. Ínnindi faqa miqí kai ínoo maqee maqee firaafáikiani. ¹³Miqífanoo Ánutufa ínni nímuqusa mapukúsee afeekaikámannimiannoo. Ínnisaimbaqa karaambáíqa Yísufa narí áiku ásauku faqa kafáa qumuréenoo ínni maréeqeenoo andeeqárausa náaquqarusaikamá nísainaqa maasá qíkoona Ánutuna áfusaa kíkíqífanoo.

Pauroofa Teesaronika máqanaasara Ánutuna ádiramau fuaqéera naakápaidanoo.

4 ¹Óo Teesaronika máqannaasa qíní qíkaqaafasaauqa qeeqá ufa maa-ufána áti qímannimianaura. Maasá ínni faqa máriafanna kámuqoo Ánutuna ádiramau fíranara qímannimíafanaqa mi-maú fífíusa dóo maqee káqi mi-maú fímaríafaqa qínée írídaqa. Karaambáíqa Yísufa qímaqimíqoonara dóo maqee ínni fuki faakí qídaqa sía óoqai undée kai káqikaaqoo Ánutuna íriranamau fuaqa, moó faqa moó faqa afeekaikámasee mi-maú fuaqa. ²Ínni faqa márianna kamuqoo Karaambáíqa Yísuna ufamau fuaqéera naamúaqira ufa óosana óosana naakápaafannana ínnee írimariafanoo.

³Ánutuna írirafa ínniara maaqímminoo márídanoo ínni andeeqára náaquqarafa márínaqa faiqí ánaasee narí úmmuari narí úmmuarirafa sía ínni rumbánoo máríani mandáinainakiqari idukírausa naanna rámassee máriaqee qiaqa. ⁴Ánutufa ínniara maaqíaqee qídanoo. Ínnee aiqámausa ínneeqa nífaaqara náaquqara úriqarara ainainee qímasee rakísídaqa andeeqára óosana máraráree qídaqa narí úmmuari narí

úmmuarirana taiká uqanna fúani. ⁵Ínnee sía aamína máqannaasa sía Ánutunara írimariasa naanna raaqa misá mandáinaina fanandíranaki máridaqa ínnee sía misá naanna raaqa. ⁶Sía ínniki moó fannoo miqínoo narí aqóónausee moo máqannaasee mandáikamma nímaqaani. Óoqai maasá ínni qímannimifannana maqee kafáa aaquqímannimaqaidaqa Karaambáiqqa fannoo mi-umuarira oosannára nárírafa máridanoo. ⁷Ánutufa sía maasára narí úmmuari narí úmmuariranaki máriaqeera maasá dáarama narí quqúsaki quqéenoofau. Maasá káaqa andeeqáranaki máriaqeera maasá dáarama quqánau.

⁸⁻⁹Faiqí fee ánaasee fee moó fannoo máa qínée qúnnufana minnísainafa sía faiqí ufafáú minniseefara Ánutufa narí náaquqara andeeqara maraquna níminna ufana rukíeefaranoo. Ínnee Teesaroonika máqannaasa Yísuna ufa írimariasa naríara naríara nídíranara ínnee írimariafaqa fífaú qímannimidaqa. Ánutufa narí kai narí áidi narí áidíranara qímannimifaqa írimariafanoo. ¹⁰Ínnee Teesaroonika máqusanaasa Yísuna ufa írimariasa Masedoonia máqa maaqaki mária nikaqaafasaasa mi-amiqira oosanná nimiqosá mária fanoo. Sía maqee iandée kai káqikaqoo naríara naríara nídiani moó faqa moó faqa firaqóo naríara naríara nídiani.

¹¹Maasá óoqai ínni faqa máridaqa qímannimíafánandee kai qídaqa kafáa qímannimidaqa. Maa-ainaináusasaa nimana mundúsaafanoo miqóo kai fuaqa. Aiqámausa ínneeqa aináiníranasaa ínneeqa rakísiaqa, aiqámausa ínneeqa nárana ínneeqa aináina ínneeqa kai máraaqa. ¹²Ínnee Yísuna ufa írimariasa miqí faqa miná ufara níkooqee maríasa ínni nimooqíqa andeeqéeafooo qifáranoo. Ínnee faqa miqídaqa sía moo áinainara sárauqinana moonásaa óonu mundúa.

Yísufa kafáa qúmuaninna úfafa.

¹³Qiní qíkaqaafasaauqa ánoona ufa síaisa kuqufíqa sía fíndifidammiafooo qímasee ikífaafau qímariana. Ínnee faqa misá naanna reefóo qímasee kúqirausara ánoona ufa íriaqee qímasee ínni qímannimidaqa. ¹⁴Maasá maaqí qídaqa ínni qímannimidaqa. Yísufa kuqufínoo kafáa minakíqari fíndifinau. Miqúnara maasá maaqí qídaqa Yísuna saqáriki máriasa kuqufifanoo Ánutufa Yísuna mara fíndifundée kai ínoo misá faqa marafíndifummá nímaqaannoo. Yísufa qúmuaninna aukwana Yísuna faqa moodáanaki máriaqeera Ánutufa marafíndifummá nímaqaannoo.

¹⁵Karaambáiqqa naamúaqímaqoo úfafa maaqímmínoo mári faqa qímannimidaqa. Karaambáiqqa qúmuaninna faasaanasaa maasá káqi márianausa sía kúqirausa nóorisaa óoru fúanauranoo. ¹⁶⁻¹⁷Mi-faasaannásaa innaarúnaindari Ánutuna daambeenda firaqóo rúannoo, qangirooqua úriqararafa ufa qíannoo, Ánutuna ukeena fuaqáannoo

dóo miqóo innaarúnaindari karaambáiqá narí uqanna qúmuannoo. Qumuráinaqa kúqirausa káqi máru kamuqoo ásauku mundírana saqárikida máriusa misá náaree kúqiranakiqari fíndifífaqa dóo miqóo maasá mi-karí káqi máriasa faqa kúqirausa faqa Ánutufa moodáanaki afapíta qumáreenoo uqéerannisainaqa asurukína kéeqakinaqa aanái óoru karaambáiqá paqúrimasee mi-karí miná faqa náaru náaru márianaura. ¹⁸Miqíannanara ínnee faiqí ánaasee faiqi kuqufufaqa nifaaqa rumbée marífaqa ikíráqee mariana mi-ufána qímánnimifanoo nifaaqa aufadáani.

Yísufa tautúmasee qúmuanninannara fáasaanara foora máriaqa.

5 ¹⁻²Mi-ainainná kambíqaaninna áukuanara maasá fífau ákara rúmasee qímánnimianaura, óoqai dóo ínnee írimariafanoo maaqímminoo máriannoo, karaambáiqá qúmuanninna kari úmmuara fásiqara foora kukéeqakinoo qúmuannoo. ³Faiqí ánaasee maaaukuannára ámiqíranaki asooáranaki márídee qímasee káqi mána mánida márifanoo dóo miqóo kai rakéemasee firaa narirafa tautúmannimaqáannoo. Sía moo ámeekamasaannoo, ánaasee innaamunai fímariandee íannoo sía aupúrarafa sía máriannoo, máriannoo.

⁴Ínnee Teesaroonika máqannaasa qíní qíkaqaafasauqa, ínnee sía asukunakíara foora nímariasa máriafanoo. Yísufa qúmira faasaana úmmuarira fasiqara foora kambíqafi naqa ínnee sía tautúmasee nisaurífaranoo. ⁵Ínnee aiqámausa káaqa qáranaki nímariasa fáasaanara foora nímariasa máriafanoo sía maasá ínnisaimbaqa eendákíara foora nímárunausa sía asukunakíara foora nímariasara foora márídaqa. ⁶Miqúnara maasá ínnisaimbaqa sía faiqéemariasanaanna raaqa nífu maqasée máriaqa. Maasá ínnee faqa sía nammári néemariasanaanna rée fúrufariaqa káqi ámiqimasee márianaura.

⁷Eendáki faiqí ánaasee faiqáidaqa eendáki nammári námasee fúrufaridaqa. ⁸Maasá sía miqímarunausa márídaqa káaqa qáranaindi márídaqa maasá sía nammári námasee fúrufariqa núaqaana káqi máriaqaana. Maasá qeeqá Yísuna saqárikirana faqa qeeqá naríara naríara rírana faqa mi-ainainaqandánnai saqári kámmándeé ukée íríqa. Maasá asumu márianafa kásooqaqee kambíqaaninnanara asasídaqa rakísida márídaqa. Mi-asasira afeesíránara pateeuqára foora qíkíaqaki afisúsee rákíranakíara foora mária.

(Óoqai níkiya itairírausa súani qíkíaqaki dárúandoo qímasee pateeuqá náriqa níkiya itairíranasaa afisímariqau. Óoqai Yísuna aukuaana Roomma máqanna rákira fasiqauqa áinna qafee afisúsee rákíranaki nímaríqau. Aiqáma ainaina samu sía qíkíaqá dárúani fee qímasee afisíqau.)

⁹Ánutufa sía maasá rusandeesámumasee narí áranaqaranaki quqárareefau qinau. Ásauku mundírana karaambáiqá Yísunannai asumu

márirana máraaqee qímaseenoo maasá rusandeesámumasee máranau. ¹⁰Mi-asaku mundiráfa minásaimbaqa maasára moodáanaki máriaqeera maasá dárirana qímaaqa maqasée kúqufa fíndifinoo máridanoo narí kaifáa qumuráinaqa kúqiqee káqi máridee narí faqa máriaqeera maasá qímaaqa maqasée kúqinau. ¹¹Ínnee mi-irirána iriséeqa soofaarí maríasa mi-iriránannai narí dadaaqí narí dadaaqídaqa narí amana narí amana mapukúaa.

Pauroofa ufa taikáidanoo nímandaidanoo.

¹²Óo maasá qíkaqaafasaa maasá qeeqá qímuqusa óokiqari ínni qímannimidaqa. Ínniki Ánutuna ufa sáiki maría fasiqausa Ánutufa maréeqeenoo mi-saikánaki uqánnisóosara qídaqa, misá ínni naamúaqira ufa qímannimiafaqa ámiqira fasiqafee qímasee náaquqamasee íriaqa. ¹³Misá nári ámiqira saikara irisée firaaqóo nóosaa qíranara ruffáida misára nídiaqa. Ínnee naríara naríara nídimarinaqa asooáranaki máriaqa.

¹⁴Qinée ínni naamúaqi maruna fasiqausa qímannimidaqa, ínni kudi fasiqauqára afeekaikámasee naakápaifaqa misá aináiniaqa, ruffee maría fasiqa anaaseesa nimana mapukúnímaqáaqa, írirana óoreeqárausa ínnee dadaaqiaqa, ínnee aiqámausa qámbaranai reendeénidaqa asooámasee qímannimíqa fuaqa. ¹⁵Ínnee maa-ainainnára faqa rakísiaqa, moó fannoo aní mandáikammamaqáinana ákiaqara sía narí mandáikammamaqaa sía mi-oosanáfa máriani. Ínnee aiqáma kari narínni narínni ámiqira óosana kai narí ámi narí ámiaqa sía ínneeqáki kai miqíaa. Ínnee aiqáma máqannaasaki máridaqa miqímannimaqáaqa. Ínneeqa írirana nimana mi-amiqira oosannásaa kai quqáaqa.

¹⁶⁻¹⁸Ínnee aiqáma kari Yísuna ufa írimariasaa asasída kai máriaqa, aiqáma eendaki fáasaana innaaru qiqá fuaqa. Aiqáma ainaina tiaki Ánutunara dúfi dúfi kai qiaqa. Ínnee mi-ufamaú fídaqa ásauku mundírana Yísunaki fídaqa Ánutufa ínniara fuaqée qímaqoomau fífáranoo.

¹⁹Náaquqara andeeqara maraquna fannoo ínni afeeka níminaqa sía miná rafáaqafuqa. ²⁰Ánutuna maraquna fannoo faiqí dadaaqínaqa sía níkoo níkaa iaqa, ámiqimasee íriaqa. ²¹Ínnee aiqáma amaana ufa sía káqi íriaqa aiqáma ufa aiqummasée iriséeqa ánoona ufa kai íriaqa. ²²Óosana óosana mandainainara eeráiriaqa.

²³Ánutufa maasá naundurái asooáranana nímmarifa ínni máriranaki náaquqara andeeqara oosana firaaqóo nímmi. Mifá kai ínni aiqáma márirana nipatasáa faqa nimana faqa maraquna faqa áaqarafa sía máriani ánukarafá kai mári mári inánoo ásauku mundírafa karaambáiqaa Yísufa miqíqa márinanaki qúmuani. ²⁴Ínnee ínneeqa mandáinainakiqari ániaqeera náaree marífa Yísufa sía akóo akaa ímarifa maqee maqee dadaaqímarifa máridannoora ánu kara óosana nímianno.

²⁵Óo Teesarooka máqannaasa maasá qíkaqaafasaa, ínee maasára maqee maqee innaaru qiaqa. ²⁶Ínee aiqáma íneeqa níkaqaafasaa nímandaidaqa moodáa fidíkara foorá nímandaaqa.

²⁷Qinée Pauroosa Karaambáíqa ufa irisée ínniara afeekaikída qímannimida ínee maa-papiqána maraséeqa minakínaa ákara ufa aiqáma Yísuna ufa írimariasa ásaana rúmasee qímannimiaqa.

²⁸Ásauku mundírana Karaambáíqa Yísuna áfaarirafa ínniki máriani.